



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., 1/2 сто-
роны 60 зл., 1/4 стороны 35 зл.,
1/8 стор. 20 зл., 1/16 стор. 10 зл.;
оголошення малы за 1 мм. 20 гр.,
в тексті 30 гр., перед текстом
40 гр. При місячном и долгом
оголошеню значна знижка.

Конто чекове Нр. 404.155.

Што дають педагогичны лицей.

Як довідуємо ся с газет, новый тып серед-
ных школ стал ся причиною згрызот родичей
и их дітей. Школяры покончили гимназии но-
вого тыпа и хотіли бы учить ся дальше в та-
ких лицейх, котры отвѣчают найлучше их за-
мислованю и способностям.

Выбрали лицей и здали экзамен, але с
браку місца сут в том році неприяты. Прихо-
дит ся им тратити рок и то без власной вины.
Родичи неприятых до лицеев дітей звернули
ся до школьных властей с просьбом потвори-
ти в лицейх таке число отдѣлов, яке выстара-
чило бы на прыняте всіх кандыдатов, але чи
тото даст ся в том році перепровадити, нѣт пев-
ности.

Штож мають робити в таких случаях не-
прияты до лицеев школяры? Нѣт другой ра-
ды: лем старати ся о их прыняте до tych ли-
цеев, котры сут непереполнены. Таким ли-
цеєм сут педагогичны лицей. Родичи неохотно
записуют своих дітей до педагогичных лицеев,
бо знають, же тоты, котры покончили учи-
тельскы семинары, не могли достати посады и
ждут на них по пару літ. Того не належит ся
в будучности бояти, бо уж в том році школь-
ном достанут учительскы посады всі кандыда-
ты — мужчины, а на другой рок вычерпають
ся также резервы кандыдатов — женцин и
через слѣдуючи два roky буде отчувати ся
брак кандыдатов на учителей.

По трьох літах выйдут перши учительскы
кандыдаты нового тыпа и будут напевно рос-
схвачены через розманты школьны округы. О
тото, штобы кто с них не достал посады, нѣт
страху.

Зрештом педагогичны лицей, в котрых
наука буде тревати три roky, тішат ся и дру-
гыма льготами, яких нѣт в інших лицейх. Оп-
лата за науку ест в них значно меньша и то-
то дає возможности користати с науки в той
школі также молодежи біднійшой.

По окончено педагогичного лицей, абсо-
львенты могут достати посады учителькы, або,
если захотят, прислугує им право вписати ся
и кончити университет, так як по окончено
каждого иного лицей. Таким способом, аб-
сольвентам педагогичных лицеев открыват ся

двери до дальней науки в высших школах
и до здобытя верховых становиск.

Прото тыж тепер, коли всі лицей сут ище
в стані твореня и коли ище многы річи не сут
належито устелены, абсольвенты гимназий-

До Польщи приїхал румунский король.

В субботу, дня 26. червня т. р. приїхал до
Польщи румунский король Кароль II. со сво-
им сыном, наслѣдником престола, князем Ми-
хаилом. В цілом краю витано короля сердеч-
но. На цілом пространствѣ от границы до Вар-
шавы громадили ся по стациях великы тол-
пы народа, витаючи с энтузіазмом короля и
князя Михаила. Желѣзнодорожны дворцы и
домы міст, через котры переїзджал король, бы-
ли прикрашены флягами и гирляндами зеле-

ных школ повинни масово вписувати ся до
педагогичных лицеев, котры дають певный ку-
сник хліба.

В наших странах находят ся педагогичны
лицей в Старом Санчі (мужеский) и в Новом
Санчі (женский). Там належит вносити пода-
ня о прыняте до вступного экзамену.

—ооо—

ни. Ціла Варшава мінила ся от барв сиво-
жолто-червеных.

Король с сыном занял в Варшавѣ дво-
рец польского короля Станислава Августа По-
нятовского т. зв. лазенковский и там ся роз-
гостил.

Дня 30. червня приїхал король до Крако-
ва, витаний сердечно через численны делега-
ции населеня. Витали его в Кракові также
группы лемковскы со всіх повітов в националь-
ных строях.

С испанской войны.

Послѣдний тыждень перешол в Испании
под знаком усиленных боев с невеликыма успѣ-
хами для повстанцов.

На астурийском фронтѣ повстанцы стара-
ют ся заняти Сантандер и здає ся, же опану-
ют его в найблизших днях. Як оповѣдають лю-
ды, котры пришли недавно соттамаль, в Сан-
тандерѣ по занятю повстанцами Бильбао на-
чал ся голод.

Бильбао достарчало передом провиантов
не лем Сантандеру, але и цілой Астурии, ко-
трой положене тепер стало ся планьше, бо не
лем не достає с Бильбао землепловов, але му-
сит выкормити ище около 400.000 басков, ко-
тры утекли перед повстанчима войсками.

На баскийском фронтѣ повстанцы заняли
ряд важных позиций и в их руки впало мно-
го оружия, 270 тысяч литров бензыны и 4.000
знарядов для бомбовозов, а также взято до не-
волі около 500 вояков.

Над ріком Харамы повстанцы предприня-
ли атаку на пѣзичии червеных войск, котру
червены войска отшмарили с великыма шко-
дами для противника.

На інших фронтах нѣт змін.

Дальша чистка в Росии.

Нѣмецке інформаційне бюро подає, же на
территории сов. Білорусии чистка ест дальше
в полном ходу.

Меже иншими в послѣдном часѣ арестова-
но там политычного комисара кавалерийской
школы и политычного комисара авиацийной
школы. Крім того 32-ох писателей и культур-
ных діятелей признано „врагами народа“.

С Гельсинфорса доносят, же на Білору-
сии арестуют штораз больше людей. Крыми-
налы переполнены бывшими комунистами и
до недавна ище видныма руководителями по-
литычного, господарчого и общественного
житя.

Всяди видно страх перед „чисткой“. Ни-
кто не знат ище, до чого она доведе и кого за-
хватит. В рядах комунистычной партии вели-
кий переполох. Число арестованных превы-
шат уж пару сот людей. Вздолж совѣтских
границ погранична стража задержала пару со-
вѣтских офицеров, котры пробовали перейти
через границу до Польщи, боячи ся отвѣствен-
ности за знакомство с розстріляныма черве-
ныма командами и с маршалом Тухачев-
ским.

Лава присяглых не признала вины Добошинского.

Пригадуеме собі всі голосну перед роком справу, где краковский инженер Добошинский собрал банду и с том бандо ударил на Мысленицы. В Мысленицах банда опановала постерунок полиции, знищила ціле помещкане старосты и зрабовала жидовскы склепы. Полиция по долшом часі розбила банду, многих арестовала, а самого Добошинского зловила в лісах над границом чехо-словацком и осадила в аресті.

Перед двома місяцями закончил ся процес против членам той банды и многы участники напада были засужены на меньши и больше кары. Процес самого Добошинского росписано отдільно перед судом окружным в Кра-

кові и переведено его в присутствию лавы присяглых судиев.

Процес тот закончил ся 26. червня. Лава присяглых 12-ома голосами не признала вины Добошинского. Судовый Трыбунал не принял до відома вердыкта присяглых, в виду чого отбуде ся ище раз новый процес при новой лаві присяглых.

Однако, если бы и нова лава присяглых не признала вины Добошинского, то суд буде змушений Добошинского освободити от вины и кары и втотчас вышло бы невстрічане в судовництві положене, бо помочники Добошинского сут уж засужены, а гершт банды, сам Добошинский был бы освобожденый.

Сталин помиловал Радека.

В московских добре поинформованных кругах удержуют ся слухы о освобожденю Радека с вязницы. Радек має поселити ся в одном провинциальном місточку. Радек має быти освобожденый на разі провизорычно актом милости Сталина за то, же он перший звернул увагу на дволичну политику маршала Тухачевского. Полне его освобождене має быти обняте амнестиом, котру мают оголосити в жолтні, в рочницу большевицкого переворота.

На Білорусии и в Грузии идут дальши аресты. В хозяйских трустах, в державных маестках и на станциях тракторов арестовано на Білорусии 367 людей.

Чи можна жити без мозга.

Мозг уважано все за центр мысли человека и воображано собі, же от величины мозга зависят способности и талант одыницы. Великим гениям и фильософам вынимано по смерти мозг, важено его и розсліджано и приписывано их генияльны подвигы величині и структурі их мозга.

Тымчасом послідны научны баданя выказуют, же люде могут жити без мозга, могут льогично думати и не сут позбавлены добрых помыслов и инициативы.

Проф. университета в Чикаго др. Гальстер, выголосил недавно на с'їзді лікарей цікавый реферат, дотычно операции мозга.

Оден биржовый фактор терпіл величезны боли от зробленого ся у него на мозгу чирака. Вымагало тото операции, бо иначе не можна было боляк выкуровати. При операции вырізано разом с боляком $\frac{3}{4}$ той части мозга, где концентруют ся осередкы нервовы, руководячи мыслями и вольом.

Початково по операции здавало ся, же пациент зваривал. Однако в міру поворота до сил, ставал ся чимраз нормальнійший. Скоро повернул до работы и занял ся продажом артыкулу, с котрым до тепер нич го не лучило.

Уж в першом тыждні выказал он великий купецкый спрыт, а его невычерпана энергия и трудолюбие спрчинили, же фирма,

МАТИ ЗАШИЛА ИГЛОМ БРЮХ СЫНОВИ.

В селі Рембихово пов. поморского пришло до кырвавой масакры в часі забавы и 25-літньому Брон. Пастиянови распорото брюх.

Мати, хотячи ратовати сына, вложила до брюшной ямы внутренности и зашила брюх иглом и звычайном нитком. В таком стані привезено Пастияна до шпиталя, где поддано его сейчас операции.

В Грузии арестовано председателя верховного суда республики грузинской Волквядзе.

Кружат также слухы, якобы арестовано Литвинова в Москві.

Процесу Ягоды не буде.

Як доносят с Москвы, процес Ягоды, котрый мали перевести в маю, не буде переведеный. Слідство обнимат чимраз ширши кругы. Совітскы власти не допустят до процесу Ягоды, навіт при закрытых дверях, бо боят ся, же Ягода на процесі може выявити много справ звязанных с діятельностью Г. П. У., о чом не повинна довідати ся николи за граница.

для котрой он робил, увеличила значно свою продукцию. Незадолго фабрыка приняла его на компана, а пак выбрано его дыректором фирмы.

Тепер ест он миллионером.

Др. Гальстер описуе дальше, же человек тот без мозга ест тепер значно приятнійший в пожитю и чув ся совсем здравый.

Як птахи отнаходят дорогу до своих гнізд.

Человек, тот пан світа и уярмитель природы, мусит нераз здати ся на инстынкт пса, або коня, если пришло ся ему заблудити в лісі и звычайно пес, або конь выпроваджают его все на властиву дорогу.

Зьрина, хоц бесідуеме о ней, же она не має розума, має якыйси, непонятный для человека ориентацийный змысл, котрый не заводит праві николи. Змысл тот ест найсильнійше розвиненый у перелетных птахов, котры каждого року, на весну и в осени робят по пару тысяч кильометров и все попадают до своего родинного гнізда.

Хотячи перекопати ся о том, чи так ест на правду, поробил в том році проф. Водзицкий пробы с боцанами. Професор злупал 8 боцанов с села Бутымы коло Жолквы и поділил их на три группы. Одну группу, зложену с 4-ох боцанов вывез до Румунии и выпустил их коло Букареста. Боцаны выглядили клювами свои крыла и полетіли ку родинным странам.

Два инши боцаны выпущено аж в Палестыні, отдаленой от Польщи о 2.800 км., а ище два перевезено до Варшавы и там их выпущено.

Всі выпущены в розмаитых місцах боцаны кружили якыйси час в воздусі, а погодивше отлетали все в правильном напрямі и всі они по долшом, або коротшом часі прилетіли до родинного гнізда в Бутымах коло Жолквы.

Килько коштувала выставка в Парыжі.

Як уж писали мы в нашей газеті, в том році уряджено світову выставу в Парыжі. На выставі той будут представлены всі державы со своим господарчим, промышленным, культурным и артыстычным добытком. Видіти тоту выставу — то видіти поменьшеный цілый світ.

На той выставі побудовали всі державы свои павильоны, в котрых можна видіти ціле богатство краю, его промышленность и торговлю, его господарче жите, его культуру и штуку. Сут в тых павильонах поменьшены фабрыкы, церквы и навіт цілы міста.

Оцінити, килько коштуе така выставка, ест дуже трудно. Знатокы подают, же коштуе она понад 1 миллиард франков. Робило при выставі понад 30 тысяч работников, не рахуючи тых, котры робили для выставки в розмаитых областях промысла и в розмаитых краях над приготовленем экспонатов.

На тоты росходы выставочный комитет достал от правительства 550 миллионов франков, рещту дало місто Парыж.

На выставі не сут готовы ище всі павильоны. До того часу видно: в районі вежи Ейфель павильоны Италии, Бельгии, Швайцарии, Бельгийского Конго, Швеции и павильон монетного двора; в районі Трокадеро побудовали павильоны: Німеччина, Дания, Россия, Норвегия, Австрия, Голяндия, Палестына, Монако; в районі Конкорд: павильон французского выставочного комитета, павильон режлямы и идеякы атракційны. В районі Елисейских полей: павильон научных открыт и выставка квітов, „павильон солидарности“ и павильон женского рукоділя. В районі дворца инвалидов: павильон полиции, парк забав. В Порт-Майо — сельско-хозяйский центр.

Билеты купуе ся на каждый павильон. На выставу приїзджают люде с цілого світа. С самой Польщи зголосило охоту выхати на выставу около 30.000 людей. При таком приїзді людей оплатит ся всадити в выставу каждую суму грошей, бо они и так вернут ся с лихвом.

Килько золота добывают в Сыбири.

Світовы финансисты занепокоены сут фактом, же на льондонском рынку появлят ся чимраз больше сыбирского золота. Як подают идеякы жерела, до войны добывано рочно 13.700 пудов золота, а тепер добыча его взроста в 4 разы и увеличат ся все.

Европейскы финансисты относят ся с недоверем до тых чисел, бо уж нераз приходило ся им быти ошуканым через совітску статистику. Во всяком случае запасы сыбирского золота сут досыть великы и могут выдвигнути сов. Росию на друге місце в світі, на што претендуе совітска преса.

Ведля обчислень с 1917 року, залежи золота в Сыбири, на Уралю и в Алтаю доходят до 1 миллиона пудов, т. е. до 16.000.000 кг., або 1.600 ваганов.

Треба однако зазначити, же золотый рынок находит ся в зависимости от политычного положеня страны, котра выкористуе не лем саме золото, але также биржевы слухы о том, або другом количестві золота. Прото тыж не можна николи сліпо вірити жадным вістям о совітском золоті.

Треба дбати о рівномірне і достаточне кормленє статку.

В господарствах горських основом доходу може быти лем статок. Острый климат и убожисте положенє ґрунту не способствують управі хлібных рослин и звычайно в горах хліба бракує. Лем гдеякы господары продают часом зерно, а решта має зерна лем тилько, штобы прокормити с трудом свои родини, а ест много и таких господарств, котры каждого року мусят докупити зерна на хліб.

Але где найти гроши на того, штобы каждого року докупити хліба? До того часу хлоп загаял ся до ліса, рубал крякы и вывозил до міста. Тепер лісы сут так вынищены, же в гдекотрых селах люде не мають уж дерева на власны потреби, а в инних старчит им ище дерева скупо. Прото до ліса хлоп уж не поїде, бо лісы счезли и лісов нїт. Треба конечно глядати инных жерел доходів и хлоп може их найти лем в добре откормленом статку.

Але посмотрме ся по наших селах, як выгядат тот статок? Ледво у пару господарей на селі видно чисто удержаны и добре откормлены коровы и вола, а решта „пожаль ся Боже“, така бідота, же ледво ногами волочит. Чи такий статок може нам дати доходи и стати ся фундаментом наших господарств? Напевно ні!

При такой господарці бідует статок и бідует газда и не отрясе ся со своей біды так долго, покаль не зрозуміє, же „корова донт ся пыском“, же теля росте также „пыском“. От коровы треба молоко купити, теля потребує также отвітной пашы, штобы розвивало ся, приберало на вазі и выросло на добру коровку. Зрештом знає о том каждый хлоп на селі и нїт потреби о том писати.

Если пише ся о том, то лем прото, же прайвї всі хотїли бы мати красны коровы, всі хотїли бы мати хосен со статку, але не всі знають ся взяти до того, а гдеякы боят ся зачати газдовати иначе, жебы их другы не высміяли.

Тот страх „перед высміянем“ став ся у нас часто причиною біды. Хлоп, хоць го и не стати тримати коня, тримат хабета, пхат в него всьо, што має найліпше, дає му сіно, конич и овес а коровы тримат на соломі. Он охотно продал бы шкапу и запряг до ярма коровы, але штож, он боїт ся, же го сусїды высміють и прото дальше бідует.

А прейца в других краях люде иначе газдуют. Кто был на войні, або и в Талергофі, тот видїл, же там часто запрягано коня с коровом, або корову и вола, або и одного вола. Там каждый робит так, як го стати и никто ся с того не сміє. Але за то там тоты коні, вола и коровы сильны, здоровы и добре откормлены. Они дають хлопцу хосен и там газда жие значно лучше, як у нас, хоць нпр. в Стырии ґрунт ест также гористый и мало урожайный.

С того видно, же и у нас можна поднести доходи с ґрунту, лем треба змінити способы господаркы.

Перше што треба зроби́ти, то обчислити точно, килько статку маме тримати и на килько штук выстарчит нам пашы, штобы статок добре и рівномірно через цілий рок кормити. Так, як человек не може мати сил, если їст раз за дуже, раз за мало, так само и статок мусит быти кормлений все рівномірно и выстарчаючи, штобы мати силу до работы и штобы давати хлопцу тоты користи, до яких ест перезначеный.

Корова, котра раз стратит молоко через

зле откормлене, не скоро причинит молока, хоць бы мы ю пак и добре кормили.

В літі треба дбати для статку о добре пасовиско и добру зелену пашу, а в зимі о добре сіно и пашу сытну. Одностаино и добре откормлений статок даст газді добрый хосен и заплатит му добре за пашу и за труд.

Обявленє в справі цін муки и печива.

На основі уповажнення Пана Воеводы Краковського с дня 14. XII. 1935. (Дн. Воев. Ч. 29. поз. 158.) и по выслуханю мніня Пов. Комисии для баданя цін постановило Новосандецке Пов. Староство ниже поданы ціны муки и печива с важностью от дня 22. червня 1937.

Повіт новосандецкый:

	гурт:	деталь:
мука житня 70%	39 зл.	0,43 зл.
мука житня 95%	33 зл.	0,38 зл.
хліб житний с 70% муки	—	0,37 зл.
хліб житний с 95% муки	—	0,32 зл.

Крыница и мушина:

	гурт:	деталь:
мука житня 70%	39,50 зл.	0,44 зл.
мука житня 95%	33,50 зл.	0,39 зл.
хліб житний с 70% муки	—	0,38 зл.
хліб житний с 95% муки	—	0,33 зл.

Ціны ґуртовны за 100 кг., ціны в деталі за 1 кг.

Кто буде жадати, або брати высши ціны, буде караный по мысли зарядж. През. Р. П. с дня 31. марта 1936. р. (Дн. З. Р. П. Нр. 91. поз. 527.) каром грошевом до 3.000 зл., або арештом до 6-ох неділь, або обома карами лучно.

Допись с села Ропок (пов. горлицкого).

Просиме помістити в Вашей газеті пару уваг, якы хочеме звернути нашому отцу духовному Йоану Тытару в справі валячих ся стодол и приходского дома, о котрых они мають казаня што неділі вмісто слова Божого.

До того часу страшили нас єгомость пеклом, а тепер обдертом стодолом. Все кричат и кричат, же стодола и клєбания ся валит. А най ся уж раз завалит, бо нам ещ не треба, а и вам ей также не треба, бо ґрунт, якый был, вы выарендовали, а решту продали.

Тож на што нам и вам стодолы, а што до клєбания, то она тыж не про нас, бо як дакто приде в справі на клєбанию, то го за двєри выпыхате, як то нераз мало уж місце. Зрештом пригадайте собі єгомость, як сте ґрунт продавали; втотчас не треба было комитєта, чи треба продати и на што.

Вы бесїдуєте, же того ест ваше и же вы мате власть, а нам ся здає, же до кого належит ґрунт, то и стодолы и клєбания. Як мате право безосновно ґрунт продати, то и до будынков не кличте людей, а тым больше не кричте на нас с казальниці ани от престола, бо тоту справу можна и повинно ся полагодити поза церквом. А в церкви лучше научити діти, штобы, як переходят коло старших, знали Бога похвалити, бо сами видите, же не дуже сте их научили.

Не дільте нас также с казальниці ани на мудрагелей, ани глупенькых и не грозте нам, же собі с нами даде раду, бо коли вы продавали ліс, котрый вы вырубали до послїдного патыка, то не кликали вы комитєт, лем глядали сте кунца по цілом повіті и втотчас не думали вы ани о стодолі, ани о клєбания, а тепер по знищено ліса глядате комитєта — глупенькых и мудрагеликов.

Але мы протестуєме категорично против такой вашей господаркы парафіяльным добром и даєме до відома высшим церковным властям о господарці нашого єгомостя, а вас єгомость просиме ище раз не порушати тых справ в церкви с казальниці, бо они не мають нич лучного с церквом. Хотите отбудовати клєбанию и стодолы, то попросте людей, жебы вам помогли зроби́ти ґонты с ялиц, якы оставили ище в приходском лісі, люды вам помогут, але при просьбі, а не грозьбі, котром никого не настрашите.

Комитет.

Комуникат

в справі перестеріганя приписов противпожарных.

Пануючи от долшого часу сильны спеки и увеличаючи ся на терені Воев. Краковського число пожаров приневолят мене до звернення Зарядам ґмин и громад увагы на потребу точного перестеріганя населенем приписов противпожарных.

В особенности пригадую, што належит мати все зборники воды, студні мусят быти отвітно удержаны, доступ до зборников воды и студень повинен быти все уможливленый. Населенє сел мусит мати все таковы, ведра, бочки с водом и драбины.

Независимо от того, населенє для власного добра повинно уважати на того, штобы коминны были належито и часто чищены и удержаны в добром стані, дітей не можна оставяти на обыстю без присмотра и опеки старших.

Не можна входити до господарчих будынков и на поды хат, особенно крытых соломом, со світлом не обезпеченым належито. Сірники, камфина и т. д. мусят быти старанно переходваны так, жебы діти не могли ся до них достати.

В случаю пожару населенє має дати всяку помоч и прийати чинну участь в локализации огня. Наконец, если заходит того потреба, мають быти поставлены сторожи денны и ночны.

С огляду на того, же вслїдствие неналежитого перестеріганя через населенє приписов безпеченства каждого року иде с дымом на терені Державы парудесят тысяч будынков и то переважно с цілым добром погорільцов, через што маліє не лем маєток прыватный, але и маєток Державы, прото о повыспом зарядженю належит безотложно повідомити заряды громад, а тоты мають повідомити людей в способ в селі практикований.

За неперестеріганє повыспих поручень и приписов виноваты будут отвітати в дорозі администраційной.

Староста (вр. Др. Лях).

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“.

Що чути в світі.

Страх на вороблі причиною процесу. Забавний случай мал місце недавно в одном селі в Югославии.

Раз оден хлоп спостерет в саді своего сусіда страх на вороблі, котрый своим одержом и маском был подобный до его жены. Понеже оба сусіды уж от давна ся вадили, тото подобие куклы до жены селянина стало ся причиною долготривалых звад, котры закончили ся аж в суді. Коли сусід не хотіл усунути на жадање ображеної кумы страха со саду, тота закрала ся раз в ночи сама до саду и знищила куклу.

Сусід заскаржил ю до суда о нарушене права власности, а хлоп со своей стороны заскаржил сусіда о обиду.

Суд станул в обороні ображеної и засудил жену сусіда, котра, як выказало слідство, была причиною цілого того приключеня, на кару.

Пожар загашено... пивом. В величезном румунском броварі „Брагадиру“ повстал пожар, котрый с великом скоростью росширил ся на пару будынков. Ратунок был утруднений, бо не было воды. Пожарна стража перетягнула в виду того шлявхы до величезных кадей, в котрых ферментовало молоде пиво и по наругодинной акции загасили огонь пивом. Шкоды выряджены через пожар сут великы.

16-кильометровый мост. В Дании начато будову двох мостов, котры будут найвекшима на світі. Оден с них буде над Великим Бельтом и получит остров Фюнен с Селяндиом. Долгота его буде выносити 16 кильометров.

Напад Индиян на фарму кольониста. Група индиян, зложена с около 500 люда, напала на кольонию Кастели в Шако в Аргентині.

Индияне, котры напали на кольонию в ціли добыты земельнодоход по поводу пануючого серед них голоду, вымордовали цілу родину одного кольониста, зложену с 4-ро людей.

Власти выслали там сильны отряды полиции.

На Далеком Выході розстріляно 161 „троцкистов“. Газеты доносят с Хабаровска, же на Далеком Выході розстріляно знова 37 людей. Таким способом число троцкистов, страченых на Далеком Выході взросло до 161 люда.

В Румунии не можна ворожити. Министертво внутренних справ Румунии выдало заряджене, забороняюче ворожити на терені цілої державы.

В Румунии занотовано случай проказы. В одной народной школі в Ботошамі в Румунии занотовано случай проказы. Повідомлено о том власти санитарны, котры поддали школяра лікарскому баданю и отставили его до изоляційного табора.

Убил органиста в костелі. В Лионі в костелі в часі службы Божой, якыйсь мужчына предостал ся на хор и убил ножом органиста. Тяжко раненый органист был перевезеный до шпиталя, где умер. Напастьника не зловлено.

Глядают ученого в бразильской пуці. С Сао Паольо в Бразылии выршила в другой половині мая нова выправа, котра має глядати в бразильской пуці англицкого ученого, котрый загынул там перед пару літами. Выправа складат ся с 45 люда. Она поділила ся на дві группы. Выправу зарсмотрено во всі средства, маючи ю обезпечити перед всякыма опасностями, а особенно перед людодержчим

дикым племенем „Кавантес“, якый живе в бразыльской пуці.

Рыбы могут жити под земльом. Недавно на безводной пустыні Сагарі вертіли в одном місци артезийску студню. Коли довертіли до 1.000 метров, выстрыснула со студні вода, а в ней находили ся живы рыбы. Розследователі земельных глубин предполагают, же вода тота мусит ся лучити подземельныма тунелями с великыма афрыканскыма ріками, с котрых на тото місце достали ся рыбы.

Вісти с краю.

Прирекали дождж за гроши. Нашли ся „помысловы“ люде, котры набрали легковірных селян на тото, же могут притягнути до села дождж. Были то два варшавскы ошусты, котры подавали себе за инжинеров и професоров университета и ходячи по селах, заявляли, же вынашли такый апарат, котрый може притягнути дождж.

Тоты ошусты уставляли в середині села, звычайне пудло радиове, перетігали дроты, завішали их на деревах, значили крейдом плиты, вырубывали на хатах таинственны знаки и забравши гроши от легковірных селян, пропадали.

Аж раз повинула ся им нога. Пришли они до села Давиды Великы в варшавском повіті и грозячи хлопам призраком голоду по поводу засухы, выдурили от них 200 злотых. Коли однак по уставленю „магичного“ апарата дождж не упал за дві години, як повіли чародіи, хлопы пустили ся за нима, догнали их, отобрали гроши и побили так, же отвезено их до шпиталя. Жде их суд и кара.

Повісил ся. Иван Попович с села Греховчыкы пов. бродского подпалил господарскы будынкы своего отца, котры згоріли цілковито.

По выполнению того преступленя, совість згрызла его так, же не мог того знести и повісил ся в лісі.

Три миллиарды злотых припали в наслідстві старущі, котра звариевала. В Америкі умер бездітно миллионер Людовик Дембицкий, котрый оставил 60 миллионів долларов. По его смерти начато глядати в Польщі и на Буковині родину умерлого и оказало ся, же найблизшом его родном ест Мария Рикель, котра має

уж 70 літ и находит ся в домі для вариятов в Черновцах.

Гром ударил в крестик на шиі. В часі бурі, яка перешла над селом Румя на Поморі, гром ударил в новопобудованный барак, в котром жила родина Костуха.

Гром влетіл до комнаты, в котрой сиділа 33-літна жена Костуха и кормила дітину и трафил в металевый крестик, завішений на шиі, якый она носила.

Костухова вышла с того приключеня праві совсем ціло. Гром пробіжал металевом ретязком вокруг шиі и оставил на шиі кырваве пасмо, а там, где был крестик, повстала лем мала ранка.

ВАЖНЕ ДЛЯ ДЯКОВ.

Повідомляю интересованных кандыдатов на дяков, а также неспытованных дяков, желающих здати испыт, што

дня 16. серпня 1937 открываю
3—4 МІСЯЧНЫЙ КУРС ДЯКОВСКИЙ.

По окончению курсу кандыдаты поддадут ся испытыви в Мысцові перед Комиссио делегованом через Апостольску Администрацию.

Платня за науку 15 злотых місячно. По близши информации звертати ся под адр.

МИХАИЛ ФЕЦИНА
пів. церк.

МЫСЦОВА — почта Жмигород.

В прекрасной горской кураційной місцевости повіта горлицкого иде на продаж

НОВА ВИЛЛЯ

о 5-ох покоях с верандами и сутерынах.

В кухні водопроводы. Вилля умебльована. До виллі належит яринный огород и 2 моргы управленого и засіяного поля. Полный инвентар господарскый живый и мертвый.

Близши информации у настоятеля
РУСКОЙ БУРСЫ В ГОРЛИЦАХ.

КУПЛЮ ВЕЛИКУ ИЛЮСТРОВАНУ БИБЛИЮ
О. МАЩАКА.

Адресовати до администрации „Лемка“
Крыница.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся
в асекураційном Товаристві
ВИТА И КРАКОВСКЕ
во ЛЬВОВІ

Асекурацію принимают на цілої Лемковщині
представителі: г. Осиф Ямовицкий — Крыница - Село
и Михаил Перелом — Сянок.